

proximi ob usum commerciorum aurum & argentum in pretio habent, formasque quasdam nostræ pecuniæ agnoscunt, atque eligunt. Interiores, simplicius & antiquius, permutatione mercium utuntur. Pecuniam probant veterem & diu notam, Serratos, Bigatosque. Argentum quoque magis quam aurum sequuntur: nulla affectione animi, sed quia numerus argenteorum facilius usui est, promiscua ac vilia mercantibus. Ne ferrum quidem superest; sicut ex genere telorum colligitur. Rari gladijs aut CAP. VI. majoribus lanceis utuntur. hastas, vel ipsorum vocabulo frameas gerunt, angusto & brevi ferro, sed ita acri & ad usum habili, ut eodem telo, prout ratio poscit, vel cominus vel eminus pugnent. Et eques quidem scuto frameaque contentus est: pedites & missilia spargunt, pluraque singuli atque in immensum vibrant, nudi aut sagulo leves. Nulla cultus jactatio: scuta tantum lectissimis coloribus distinguunt. Paucis lorice: vix uni alterive cassis aut galea. Equi non formâ non velocitate conspicui: sed nec variare gyros in morem nostrum docentur. in rectum aut uno flexu dextros agunt, ita con-